

摘藻堂四庫全書薈要

史部

欽定四庫全書薈要

史部

文獻通考卷三百十三

詳校官員外郎臣潘紹觀



欽定四庫全書薈要卷九千六百三十五

史部

文獻通考卷三百十三

鄱陽馬端臨貴與著

物異考十九

鳳凰

虞舜簫韶九成鳳凰來儀

韶舜樂名言簫見細樂之備  
雄曰鳳雌曰凰靈鳥也儀有

容儀備樂九奏而致鳳凰  
則餘鳥獸不待九而率舞

漢昭帝始元三年冬十月鳳凰集東海遣使者祠其處

宣帝本始元年五月鳳凰集膠東千乘 四年五月  
鳳凰集北海安丘淳于 地節二年四月鳳凰集魯郡  
羣鳥從之 元康二年三月以鳳凰集賜天下吏民爵  
女子牛酒鰥寡高年帛 神爵二年鳳凰集京師羣鳥  
從者以萬數 四年冬十月鳳凰十一集杜陵十二月  
鳳凰集上林 五鳳三年鸞鳳集長樂宮東闕中樹上  
飛下止地文章五色

東坡蘇氏曰黃霸傳言時鳳凰神爵數集郡國頽

川尤多天子以霸治行長者下詔稱揚此可疑也  
霸以鵠為神爵不知潁川之鳳以何物為之邪

致堂胡氏曰孝宣之世誠安且治矣然方之堯舜  
成康可封刑措之俗無乃尚遠有不及乎鳳凰何  
為而屢至哉自本始逮黃龍二十五年間天變則  
日食星孛大雨雹地變則四十九郡同日震山崩  
壞宗廟殺人民以人事論之趙蓋楊韓四良臣無  
罪而死元康二年中子弟殺父兄妻殺夫者二百

四十二人魏相以為大故者不論他年然則世雖  
安治亦多舛逆不得稱太平決矣鳳凰表太平之  
瑞也何為而至哉宣帝繼武帝之後撫養百姓不  
興兵革親致康阜其心自喜必有窺見微意者故  
爭言祥瑞以侈耀之雖然所謂鳳者非也何以明  
之黃霸以鵠為神爵而神爵年號非有他異焉乃  
為鳳凰而名之然則其時公以鵠為神爵神爵為  
鳳凰則鳳凰羣集非鵠而何雖名治安而未及古

正使有鳳尚不足貴况非鳳邪此可破千載之疑而發一笑為後世自欺之戒也或曰漢權歸外家自王鳳始殆天以告爾然則尤當警懼者也

後漢章帝元和三年正月鳳凰集肥城五月詔曰乃者

鳳凰黃龍鸞鳥比集七郡

孫之柔瑞圖曰鸞鳥者赤神之精鳳凰之佐雞身而毛色

赤被五采鳴中五音人居進退有序則至也此類也

或一郡再見其賜天下

吏民爵及帛有差 安帝延光三年新豐上言鳳凰集

西界亭

今新豐縣西原有鳳凰原俗傳云即此時鳳凰所集之處也

二月戊子有五

色大鳥集濟南臺十月又集新豐時以為鳳凰陽明之

應故非明主則隱不見凡五色大鳥似鳳者多羽蟲之

孽是時安帝信中常侍樊豐江京阿母王聖及外屬耿

寶等讒言免太尉楊震廢太子為濟陰王不愆之異也

章帝末號鳳凰百四十九見時直臣何敞以為羽孽

似鳳翱翔殿屋不察也

臣昭曰已論之於敞傳

記者以為其後章

帝崩以為驗按宣帝明帝時五色鳥羣翔殿屋賈逵以

為胡降徵帝多善政雖有過不及至衰缺末年胡降二



十萬口是其驗也帝之時羌胡外叛讒慝內興羽孽之

時也樂叶圖徵說五鳳皆五色為瑞者一為孽者四

叶圖

徵曰似鳳有四並為妖一曰鸛鵒鵒喙圓目身義戴信  
嬰禮膺仁負智至則旱疫之感也二曰發明鳥喙大頸  
大翼身仁戴智嬰義膺信負禮至則喪之感也三曰焦  
明長喙疏翼圓尾身義戴信嬰仁膺智負禮至則水之  
感也四曰幽昌銳目小頭大身細足脰若鱗葉身智戴  
信負禮膺仁至則旱之感也國語曰周之興也鶉鷩鳴  
岐說文曰五方神鳥東方曰發明南方曰焦  
明西方曰鸛鵒北方曰幽昌中央曰鳳凰

桓帝元

嘉元年十一月五色大鳥見濟陰己氏時以為鳳凰此

時政治衰缺梁冀秉政阿枉上幸亳后皆羽孽時也

臣昭

按魏朗對策桓帝時雉入太  
常宗正府朗說見本傳註

靈帝光和四年秋五色

大鳥見於新城衆鳥隨之時以為鳳凰時靈帝不恤政  
事常侍黃門專權羽翼之時也衆鳥之性見非常斑駁  
好聚觀之至於小爵希見梟者覩見猶聚  
魏文帝黃初元年八月石邑縣言鳳凰集

吳孫權黃武四年蒼梧言鳳凰見 黃龍元年夏口武

昌並言鳳凰見 孫亮建興二年有大鳥五見於春申

吳人以為鳳凰

詳見羽  
蟲門

孫皓建衡三年西苑言鳳凰

見明年改元鳳凰

晉武帝泰始元年郡國言鳳凰見凡六 二年鳳凰六

見 五年鳳凰見於趙國 穆帝升平四年二月鳳凰

將九雛見於豐城十一月鳳凰復見於豐城羣鳥隨之

五年鳳凰見於沔北

宋文帝元嘉十四年正月戊戌鳳凰二見於都下衆鳥  
隨之改其地曰鳳凰里

周武帝天和元年七月梁州上言鳳凰集楓樹衆鳥列

侍以萬數

唐武后長壽三年十一月陳州上言苑丘縣鳳凰集衆  
鳥數萬前後翅從行列齊整色別為羣後三日改元儀  
鳳

蜀王建元年鳳凰見萬歲縣

漢劉晟時鳳凰見邕州

宋太宗端拱元年八月有鳳凰集廣州清遠縣解舍栢  
樹高六尺衆鳥隨之向東北去 真宗景德元年五月

白州有三鳳自南來入城中羣禽圍繞至萬歲寺前棲  
百尺木龍樹身長九尺高五尺其文五色冠如金杯  
神宗熙寧七年六月乙未廣州言增城縣鳳凰見

### 雞禍

春秋左氏傳周景王時大夫賓起見雄雞自斷其尾劉  
向以為近雞禍也時王有愛子子朝王與賓起陰謀欲  
立之田於北山將因兵衆殺適子之黨未及而崩王子  
爭國王室大亂其後賓起誅死子朝奔楚而敗京房易

傳曰有始無終厥妖雄雞自斷其尾

漢宣帝黃龍元年未央殿輅輪中雌雞化為雄

輅與路同輪音

零厥名也

毛衣變化而不鳴不將無距

將謂率領其羣距雞附足骨闕時所用刺

之元帝初元中丞相府史家雌雞伏子漸化為雄冠

距鳴將永光中有獻雄雞生角者京房易傳曰雞知

時知時者當死房以為已知時恐當之劉向以為房失

雞占雞小畜主司時起居人

為人起居之節

小臣執事為政之

象也言小臣將秉君威以害正事猶石顯也竟寧元年

顯伏辜此其驗也或曰顯何足以當此昔武王伐殷誓  
師曰牝雞無晨牝雞之晨惟家之索今殷王受惟婦言  
是用由是論之黃龍初元永光雞變廼國家之占妃后  
象也黃龍元年宣帝崩元帝立王妃將為后故是歲未  
央殿雌雞化雄明其占在正宮也不鳴不將無距貴始  
萌而尊未成也初元元年立王妃為后以后父丞相少  
史王禁為陽平侯明年立皇后子為太子故應是丞相  
府史家雌雞化為雄其占即丞相少史之女也伏子者

明已有子也冠距鳴將者尊已成也永光二年禁薨子  
鳳嗣侯元帝崩成帝遂委政于元舅王氏之權自鳳始  
故於鳳始受爵位時雄雞有角明視作威專君害上危  
國者從此人始也京房易傳曰賢者居明夷之世知時  
而傷或衆在位厥妖雞生角時主獨又曰婦人顓政國  
不靜牝雞雄鳴主不榮故房以為已亦在占中矣後漢  
靈帝光和元年南宮侍中寺雌雞欲化雄一身毛皆似  
雄但頭冠尚未變詔以問議郎蔡邕邕對曰貌之不恭



則有雞禍臣竊推之頭元首人君之象今雞一身已變  
未至於頭而上知之是將有其事而不遂成之象也若  
應之不精政無所改頭冠或成為患滋大是後張角作  
亂稱黃巾破壞四方

魏明帝景初二年廷尉府中雌雞化為雄不鳴不將干  
寶曰是歲宣帝平遼東百姓始有與能之義此其象也  
然晉三后並以人臣終而不鳴不將又天意也

晉惠帝元康六年陳國有雞生雄雞無翅既大墜坑而

死王隱以為雄者允嗣子之象坑者母象今雞生無翅墜坑而死此子無羽翼為母所陷害乎於後賈后誣殺愍懷此其應也 泰安中周玘

起音

家雌雞逃承雷中六

七日而下奮翼鳴將獨毛不變其後有陳敏之事敏雖控制江表終無紀綱文章殆其象也卒為玘所滅雞禍見玘家又天意也京房易傳曰牝雞雄鳴主不榮 元帝太興中王敦鎮武昌有雌雞化為雄天戒若曰雌化為雄臣陵其上其後王敦再攻京師 孝武太元十三

年四月廣陵高平閭嵩家雌雞生無右翅彭城人劉象之家雞有三足京房易傳曰君用婦人言則雞生妖是時主相並用尼媼

鳥老反

之言寵賜過厚故妖象見焉

安帝隆安元年八月琅琊王道子家青雌雞化為赤雄雞不鳴不將桓玄將篡不能成業之象四年荊州有雞生角角尋墮落是時桓玄始擅西夏狂慢不肅故有雞禍天戒若曰角兵象尋墮落者暫起不終之妖也後皆應也元興二年衡陽有雌雞化為雄八十日而冠

姜天戒若曰衡陽桓立楚國之邦略也及桓立篡位果八十日而敗此其應也

隋文帝開皇中有人上書言頻歲已來雞鳴不鼓翅類腋下有物而妨之翻不得舉肘腋之臣當為變矣書奏不省京房易飛侯曰雞鳴不鼓翅國有大害其後大臣多被夷滅諸王廢黜太子幽廢煬帝大業初天下雞多夜鳴京房易飛侯曰雞夜鳴急令又云昏而鳴百姓有事人定鳴多戰夜半鳴流血漫漫及中年已後軍國

多務用度不足於是急令暴賦責成守宰百姓不聊生矣各起而為盜戰爭不息屍骸被野

唐武后垂拱三年七月冀州雌雞化為雄 永昌元年

明州松州各有雌雞化為雄 中宗景龍二年春滑州

匡城縣民家雞有三足京房易傳占曰君用婦言則雞

生妖 玄宗好鬪雞貴臣外戚皆尚之貧臣或弄木雞

識者以為雞酉屬帝生之歲鬪者兵象近雞禍 宣宗

大中八年九月考城縣民家雄雞化為雌伏子而雄鳴

雄化為雌王室將卑之象反雌伏也漢宣帝時有此異至元帝而王氏始萌蓋馴致其禍也懿宗咸通六年

七月徐州彭城民家雞生角角兵象雞小畜猶賤類也宋高宗紹興初陳州民蓄雞忽人言近雞禍也後河南為偽齊所據時松陽縣民家雞生三足與唐志景龍中雞禍同占縣治有雞伏卵毛生殼外近雞禍亦毛孽也孝宗乾道六年衢州西安縣官塘有物怪雞首人身高丈餘晝見於野寧宗慶元三年饒州壘舍雞卵出

蛇近雞孽亦蛇孽也徽州婺源縣張村民家雌雞化為雄烹之形冠距而腹卵孕同里洪氏家雄雞伏子中一雛有三足

### 龍蛇之異

夏孔甲之時天降二龍有雌雄孔甲不能食未得豢龍

氏

豢養也穀食曰豢

陶唐既衰其後有劉累學擾龍

擾音柔馴也能順養

得其嗜慾於豢龍氏以事孔甲孔甲賜其姓曰御龍氏更豕

韋之後龍一雌死潛醢以食夏后夏后享之既而使求

之懼而遷去 史記夏后氏之衰有二龍止於夏庭而

言余褒之二君也

褒古國名

夏帝卜殺之去之止之莫吉卜

請其簠而藏之乃吉

應劭曰簠沫也鄭氏曰簠音牛齡之齡師古曰去謂驅逐也止謂拘

留也去音丘呂反

於是布幣策告之

師古曰莫幣為禮讀策詞而告之也說者

以為策者釋米蓋失之矣

龍亡而簠在乃匱去之

師古曰匱匱也去藏也匱音讀去音

丘呂反

其後夏亡傳匱於殷周三代莫發至厲王末發而

觀之簠流於庭不可除也厲王使婦人羸而譟之

應劭曰羸

呼曰譟師古曰

簠化為元龜

韋昭曰元黑龜蜃蜃也似蛇而有足師古曰龜似龜



而大非蛇  
及蜚蜴

入後宮處妾遇之而孕

師古曰處妾  
宮中之童女

生子懼

而棄之宣王立女童謠曰壓弧箕服實亡周國

服虔曰  
壓壓桑

也師古曰女童謠閭里之童女為歌謠也壓山桑之有  
點文者也木弓曰弧服盛箭者即今之步叉也箕草似

荻而細織之為服也壓音  
一筆反箕音基荻音敵

後有夫婦鬻是器者宣王使

執而僇之

師古曰鬻賣  
也音戈六反

既去見處妾所棄妖子聞其夜

號哀而收之遂亡奔褒後褒人有罪入妖子以贖是為

褒姒幽王見而愛之生子伯服王廢申后及太子宜臼

而立褒姒伯服代之廢后之父申侯與繒西貳戎共攻

殺幽王

師古曰吠戎即犬戎亦曰昆夷

詩曰赫赫宗周褒姒威之

師古曰小

雅正月之詩也赫赫盛貌也宗周鎬京也威滅也音呼悅反

劉向以為夏后季世周

之幽厲皆諄亂逆天

師古曰諄惑也音布肉反

故有龍鼃之怪近龍

蛇孽也釐血也一曰沫也縻弧桑弓也箕服蓋以箕草

為箭服近射妖也女童謠者禍將生於女國以兵寇亡

也

師古曰因婦以致兵寇也

左氏傳魯莊公時有內蛇與外蛇鬪鄭南門中內蛇死

劉向以為近蛇孽也先是鄭厲公劫相祭仲逐兄昭公

代立後厲公出奔昭公復入死子儀代立厲公自外劫  
大夫傅瑕使繆子儀此外蛇殺內蛇之象也蛇死六年  
而厲公立莊公問申繻曰猶有妖乎對曰人之所忌其  
氣燄以取之妖由人興也人亡釁焉妖不自作人棄常  
故有妖京房易傳曰立嗣子疑厥妖蛇居國門闕文  
公十六年夏有蛇自泉宮出

泉宮即泉臺

入於國如先君之

數劉向以為近蛇孽也泉宮在園中公母姜氏曾居之  
蛇從之出象宮將不居也詩曰維虺維蛇女子之祥又

蛇入國國將有女憂也秋公母薨公惡之乃毀泉臺後

二年公薨公子遂殺文之二子而立宣公文公夫人大

歸於齊 昭公十九年龍鬪於鄭時門之外洧淵劉向

以為近龍孽也鄭以小國攝乎晉楚之間重以強吳時

子產任政內惠於民外善辭令以交三國鄭卒亡患能

以德消變之效也京房易傳曰衆心不安厥妖龍鬪

漢高祖母媼常息大澤之陂

休息而寢也

夢與神遇是時雷

電晦冥父太公往視則見交龍其上已而娠遂產高祖

高祖為亭長送徒驪山被酒夜經澤中有大蛇當徑

乃拔劍斬蛇蛇分兩頭

詳見人異門

惠帝二年正月癸酉

旦有兩龍見於蘭陵延東里溫陵井中至乙亥夜去劉

向以為龍貴象而困於庶人井中象諸侯將有幽執之

禍其後呂太后幽殺三趙王諸呂亦終誅滅京房易傳

曰有德將害厥妖龍見井中又曰行刑暴惡黑龍井出

文帝十五年黃龍見於成紀 武帝太始四年七月

趙有蛇從郭外入與邑中蛇鬪孝文廟下邑中蛇死二

年秋有衛太子事事自趙人江充起 宣帝甘露元年

黃龍見新豐 成帝鴻嘉元年冬黃龍見真定

後漢光武建武十二年六月黃龍見東阿 章帝建初

五年有八黃龍見於泉陵

伏侯古今註曰見零陵泉陵相水中相與戲其大二如馬

有角六枚大如駒無角

安帝延光元年九真言黃龍見無功歷

城琅邪言黃龍見時安帝聽讒免太尉楊震楊震自殺  
又帝獨有一子以為太子信讒廢之是皇不中故有龍  
孽時多用佞媚故以為瑞應明年正月東郡又言黃龍

二見濮陽 桓帝建和元年沛國言黃龍見譙 元嘉

二年濟陰言黃龍見句陽金城言黃龍見允街 桓帝

即位有大蛇見德陽殿上雒陽市令淳于翼曰蛇有鱗

甲兵之象也見于省中將有椒房大臣受甲兵之誅也

其後梁冀以逆誅 延熹七年六月壬子河內野王山

上有龍死長可數十丈

袁山松書曰長可百餘丈

襄楷以為夫龍者

為帝王瑞易論大人天鳳中黃山宮有死龍漢兵誅莽而世祖復興此易代之徵也至建安二十五年魏文帝

代漢

臣昭曰夫屈申雖見變化無方非顯死之體橫強之畜易況大聖實類君道野王之異豈桓帝將崩

之表乎妖等占殊其例斯衆苟欲附會以同天鳳則帝涉三主年踰五十此為迂濶將恐非徵矣

永

康元年八月巴郡言黃龍見時吏傅堅以郡欲上言內

白事以為走卒戲語不可太守不聽嘗見堅語云時民

以天熱欲就池浴見池水濁因戲相恐此中有黃龍語

遂行人間聞郡欲以為美故言時史以書帝紀桓帝時

政治衰缺而在所多言瑞應皆此類也又先儒言瑞興

非時則為妖孽而民訛言生龍語皆龍孽也靈帝建



寧二年夏青蛇見御座軒前張奐上疏言陳蕃竇氏未被明宥妖青之來皆為此也

敦煌實錄曰蛇長六尺夜於御前當軒而見

熹平元年甲午青蛇見御座上是時靈帝委任宦者王  
室微弱 五年沛國言黃龍見譙光祿大夫橋元問太  
史令單颺此何祥也曰其國後當有王者興不及五十  
年亦當復見天事恒象此其應也內黃殷登默而記至  
四十五年登尚在時延康元年魏王丕嗣位三月黃龍  
見譙登聞之曰單颺之言其驗茲乎

魏明帝青龍元年正月甲申青龍見邽之摩陂井中凡瑞興非時則為妖孽况困於井非嘉祥矣魏以改年非也干寶曰自明帝終魏世青龍黃龍見者皆其主廢興之應也魏土運青木色而不勝於金黃得位青失位之象也青龍多見者君德國運內相尅伐也故高貴鄉公卒敗於兵按劉向說龍貴象而困井中諸侯將有幽執之禍也魏世龍莫不在井此居上者逼制之應高貴鄉公著潛龍詩即此旨也 高貴鄉公正元元年戊戌黃

龍見於鄴井中 甘露元年正月辛丑青龍見軹縣井  
中六月乙丑青龍見元城縣界井中 二年二月青龍  
見溫縣井中 三年黃龍青龍俱見頓丘冠軍陽夏縣  
界井中 四年正月黃龍二見寧陵縣界井中 元帝  
景元元年十二月甲申黃龍見華容縣井中 三年二  
月龍見軹縣井中

吳孫權黃武元年鄱陽言黃龍見 黃龍元年夏口武  
昌並言黃龍見權即皇帝位改元 赤烏五年海鹽言

黃龍見 九年雲陽言黃龍見 孫休永安四年九月  
布山言白龍見 五年始新言黃龍見 六年泉陵言  
黃龍見又長沙言青龍見 孫皓天冊中龍乳於長沙  
人家啖雞雛京房易傳曰龍乳人家王者為庶人其後  
皓降晉

晉武帝泰始元年郡國言白龍見凡二 二年青龍十  
見黃龍九見 三年白龍二見弘農澠池 五年青龍  
二見於滎陽白龍二見於趙國 六年白龍二見於東

堯 咸寧二年六月白龍二見新興井中又見武庫井

中十一月白龍二見於梁國 太康元年白龍三見於

永昌 二年白龍二見於濟南 五年白龍見京兆

九年青龍黃龍各一見於魯國又龍見武庫井中帝觀

之有喜色百僚將賀劉毅獨表曰昔龍釐侯滋反夏庭禍

發周室龍見鄭門子產不賀帝答曰朕德政未修未有

以應受嘉祥遂不賀也孫盛曰龍水物也何與於人子

產言之當矣但非其所處實為妖災夫龍以飛翔顯見

為瑞今則潛伏幽處非休祥也漢惠帝二年兩龍見蘭陵井中本志以為其後趙王幽死之象武庫者帝王威御之器所寶藏也屋宇邃密非龍所處是後七年藩王相害二十八年果有二胡僭竊神器二逆皆字曰龍此之表異為有證矣愍帝建興二年十一月抱罕羌妓產一龍子色似錦文常就母乳遙見神光少得就視此亦皇極不建於是帝竟淪沒

呂纂末龍出東廂井中到其殿前蟠卧比旦失之俄

又有黑龍升其宮門咸以為美瑞或曰龍者陰類出入有時今而屢見必有下人謀上之變後纂果為呂超所殺

武帝咸寧中司徒府有<sup>音</sup>二大蛇長十許丈居聽事平僚<sup>老</sup>上而人不知但數年怪府中數失小兒及猪犬之屬

後有一蛇夜出被刃傷不能去乃覺之發徒攻擊移時乃死夫司徒五教之府此皇極不建故蛇孽見之漢靈帝時蛇見御座楊賜以為帝溺於色之應也魏代宮人

猥多晉又過之燕游是酒此其孽也詩云維虺維蛇女子之祥也 惠帝元康五年三月癸巳臨淄有大蛇長十餘丈負二小蛇入城北門逕從市入漢城陽景王祠中不見天戒若曰昔漢景王有定傾之功而不厲節忠慎以至失職奪功之辱今齊王罔不悟雖建興復之功而驕陵取禍此其徵也 明帝太寧初武昌有大蛇常居故神祠空樹中每出頭從人受食京房易傳曰蛇見於邑不出三年有大兵國有大憂尋有王敦之逆 恭



帝元熙元年冬東方黑龍四登於天易傳曰冬龍見天子亡社稷大人受命

慕容皝時有黑龍白龍各一見於龍山皝率群寮觀之去龍二百步祭以太牢二龍交首嬉翔解角而去皝大悅赦其境內號新宮曰和龍

宋高祖微時行止時見二小龍附翼樵漁山澤同侶或亦觀焉及貴龍形更大後伐荻新洲見大蛇長數丈射之傷明日復至洲裏聞有杵臼聲及往覘之見有童子

數人皆著青衣於榛中搗藥問其故答曰我王為劉寄奴所射合散傳之帝曰王神何不殺之答曰寄奴王者不死不可殺也帝叱之皆散仍收藥而反文帝發江陵有黑龍躍負上所乘舟左右莫不失色上謂王曇首曰此乃夏禹所以受命吾何德以堪之至都羣臣勸進即位

齊東昏侯永元三年七月丙辰龍鬪於建康淮激水五里

梁武帝天監二年北梁州潭中有龍鬪潰霧數里龍蛇之孽洪範五行傳曰龍獸之難害者也天之類君之象天氣害君道傷則龍亦害鬪者兵革之象也京房易飛候曰衆心不安厥妖龍鬪是時帝初即位而有陳伯之劉季連之亂國內危懼普通五年六月龍鬪於曲阿王陂因西行至建陵城所經之處樹木折開數十丈與天監二年同占經建陵而樹木折者國有兵革之禍園陵殘毀之象時帝專以講論為務不崇耕戰將輕而卒

情君道既傷故有龍鬪之應帝殊不悟至太清元年黎  
州水中又有龍鬪波浪涌起雲霧四合而見白龍南走  
黑龍隨之其年侯景以兵來降帝納之而無備國人皆  
懼俄而難作帝以憂崩 大同十年夏有龍夜因雷而  
墮延陵人家井中明旦視之大如驢將以戟刺之俄見  
庭中及室中各有大蛇如數百斛船家人奔走洪範五  
行傳曰龍陽類貴象也上則在天下則在地不當見庶  
人邑里室家井中幽深之象也諸侯且有幽執之禍皇

不建之咎也後侯景反果幽殺簡文於酒庫宗室王侯皆幽死 中大同元年有大蛇鬪曲阿縣建陵隧中其

一被傷奔走 元帝承聖二年有兩龍見湘州西江

三年三月主衣庫見黑蛇長丈許數十小蛇隨之舉頭高丈餘南望俄失所在帝又與宮人幸元洲苑復見大蛇盤屈如前羣小蛇遶之並黑色帝惡之宮人曰此非怪也恐是錢龍帝勅所司即日取數千萬錢鎮於蛇處以厭之因謀法會赦囚徒振窮乏退居栖心省又蛇從

屋墜落帝帽上忽然便失又龍光殿上所御肩輿復見  
小蛇紫屈輿中以頭駕夾膝前金龍頭上見人走去逐  
之不及城壕中龍騰出煥爛五色竦躍入雲六七小龍  
相隨飛去羣魚騰躍墜死於陸道龍處為窟若數百斛  
圖舊大城上常有紫氣至時稍復消歇先時有二龍  
自南郡城西升天百姓聚觀五采分明江陵故老竊相  
泣曰昔年龍出建康淮而天下大亂今復有焉禍至無  
日矣帝聞而惡之踰年遘禍

陳武帝討侯景軍頓西昌有龍見水濱高五丈五尺鮮  
曜軍人觀者數萬人 永定三年正月丁酉夜大雪及  
旦太極殿前有龍跡現 宣帝太建十一年正月龍見  
南兖州池中與梁大同十年同占未幾後主嗣位荒淫  
至於亡國為俘 後主末年有青龍出建陽門井涌霧  
又見大蛇地中分首尾各走

東魏孝靜帝太平二年龍見并州人家井中 武定元  
年有大蛇見虎牢城時高仲密以虎牢叛附西魏神武

為西兵所窘

北齊文宣天保九年有龍長七八丈見齊州大堂占同  
大同十年明帝崩太子殷立常山王演廢而害之武  
成河清元年龍見濟州浴堂中占同天保九年二年  
齊州上言濟河水口見八龍升天後主天統四年貴  
鄉人伐枯桑得一黃龍折脚死於孔中齊稱木德龍君  
象木枯龍死不祥之甚其年武成崩武平三年龍見  
邯鄲井中其氣五色屬天又見汲郡佛寺澗井中占同



河清元年後主竟降周後被誅 七年并州招遠樓下有赤蛇與黑蛇鬪數日赤蛇死赤齊尚色黑周尚色鬪死滅亡之象也後主任用邪佞與周師連兵於晉州之下委軍於孽臣高阿那肱竟啓敵人皇不建之咎也後主遂為周師所虜

瑯琊王儼壞北宮中白馬浮圖石趙時澄公所建見白蛇長數丈迴旋失所在時儼專誅失中之咎也見變不知戒以及於難

後周武帝建德五年黑龍墜於亮州而死龍君之象黑  
周所尚色墜死不祥後二歲帝崩太子立宣帝大象  
元年有黑龍與赤龍鬪於汴州水側黑龍死次年宣帝  
崩靜帝立禪於隋

隋文帝仁壽四年龍見代州總管府井中其龍或變為  
鐵馬甲士彎弓上射之象變為鐵馬近馬禍也彎弓上  
射又近射妖諸侯將有兵革之變致幽囚也後漢王諒  
坐反誅

唐太宗貞觀八年七月隴右大蛇屢見蛇女子之象大者有所象也又汾州青龍白龍見白龍吐物在空中光明如火墮地地陷掘之得元金廣尺長七寸高宗顯慶二年五月庚寅有五龍見於岐州之皇后泉睿宗先天二年六月京師朝堂磚下有大蛇出長丈餘有大蝦蟆如盤而目赤如火相與鬪俄而蛇入於大樹蝦蟆入於草蛇蝦蟆皆陰類朝堂出非其所也玄宗開元四年六月彬州馬嶺山下有白蛇與黑蛇鬪白蛇長六

七尺吞黑蛇入腹口眼血流黑蛇長丈餘頭穿白蛇腹  
出俱死 天寶中洛陽有巨蛇高丈餘長百尺出芒山  
下胡僧無畏見之曰此欲決水渚洛城即以天竺法呪  
之數日地裂 十四載七月有二龍鬪於南陽城西易  
坤上六龍戰于野文言曰陰疑于陽必戰 肅宗至德  
元載八月朔成都丈人廟有肉角蛇見 二載三月有  
蛇鬪於南陽門之外一蛇死一蛇上城 德宗建中二  
年夏趙州寧晉縣沙河北有棠樹甚茂民祠之為神有

蛇數百千自東西來趨北岸者聚棠樹下為二積留南岸者為一積俄有徑寸龜三繞行積地盡死而後各登其積野人以告蛇腹皆有瘡若矢所中刺史康日知圖其事奉三龜來獻 四年九月戊寅有龍見於汝州城壕龍大人象其潛也淵其飛也天城壕失其所也 貞

元十八年八月滄州言白龍見 貞元末資州得龍文餘西川節度使韋臯匣而獻之百姓縱觀三日為煙所薰而死 憲宗元和十年四月滑州言青龍見於新開

河 文宗太和二年六月丁丑西北有龍鬪 三年成  
都門外有龍與牛鬪 開成元年宮中有衆蛇相與鬪  
僖宗乾符三年三月奉天鎮上言金龍晝見自河升  
天 光啓二年冬鄜州洛交有蛇見於縣署復見於州  
署蛇冬則蟄易曰龍蛇之蟄以存身也 昭宗光化三  
年九月杭州有龍鬪於浙江水溢壞民廬舍占同天寶  
十四載

蜀王建元年萬歲縣黃龍見 武定三年八月有龍

五十見洵陽水中 永平二年十二月黃龍見富義

江又見大昌池

宋太祖從周世祖征淮南戰於江亭有龍自水中向太祖奮躍識者驚異以為出潛之兆 乾德五年京師雨

有黑龍見尾於雲際自西北趨東南占主大水明年州府二十四水壞田廬 六年四月單州單父縣民王美

家龍起井中暴風雨漂廬舍失族屬及壞舊鎮廨舍三百五十餘區大木皆拔 開寶七年六月棣州有火自

空墜於城北門樓有物抱東柱如龍金色足三尺許其  
氣甚腥旦視之壁上有煙痕爪迹三十六 太宗太平  
興國二年五月白龍見寧州要冊龍廟池中長數十丈  
東向吐青白雲見者千餘人 真宗大中祥符元年八  
月青蛇出無為軍解長數尺許 三年內侍任文慶奉  
詔於茅山設醮禱郭真人池取雙龍以歸長二寸許鱗  
極細腹如玳瑁置手中仰覆無懼中路風雨失一五月  
內出以示近臣令文慶送還茅山至華陽宮投池中俄



於岸側樹上觀二龍一乃放還者一乃所失者 六年

五月迎奉聖祖至穀熟縣於聖祖舟中幢節上得小龍  
二如茅山池中畜於禁中己巳方午忽失一守者求之  
不獲是夜聞雷聲有光如火照淨閣翼日失者復至即  
遣使送還茅山六月趙州言聖像玉石舟度河之石橋  
時河水淺澁有黑龍鼓浪進舟凡歷二灘悉然舟既度  
河流復故詔遣官即其所致祭上清宮先天節道場香  
奩中獲小龍背有金彩三道尾有翠文寸餘八月建昌

軍部民家麻姑山仙都觀設醮已巳五鼓有龍出玉皇殿西北醮壇下升中天迴視長數尺金色隱隱有雷聲聞數里神宗熙寧二年建州民楊緯言元年三月大雷雨所居之處有黃龍見下獲一木如龍而形未具七月雷雨如初復有龍飛其上及霽木龍尾翼足皆具歸合舊木宛然一體圖象以進徽宗宣和元年夏雨連晝夜凡數日及霽開封縣前茶肆中有異物如犬大蹲踞卧榻細視之身僅六七尺色蒼黑其首類驢兩頰作

魚頷而色正綠頂有角坐極長於其際始分兩歧聲如  
牛鳴與世所繪龍無異茶肆近軍器作坊兵卒來觀共  
殺食之已而京城大水訛言龍復讐云 高宗紹興初  
朱勝非出守江州過梁山龍入其舟纔長數寸赤背綠  
腹白尾黑爪甲有聲目有光近龍孽也時行都柴塚橋  
旌忠廟有三蛇出没庭廡大者盈尺方鱗金色首脊有  
金綫遇霽或變化數百於蕉卉間廟徙而蛇孽亦絕  
五年金人冷山有二龍死冷氣腥焰襲人其一無角其

一額有深穴如斧鑿痕金人吳乞買欲截其首或言不

祥乃止吳乞買卒以是歲死 七年五月乙酉汴京有

龍撼宣德門滅宣德二字劉豫亟命葺之君龍象也宣

德帝居也非豫所宜僭撼滅亡象也是歲偽齊亡 八

年夏金人熙州灤水有蒼龍見明日為黃龍以爪擎嬰

兒為戲者三日有帝者服乘白馬六蟾蜍在其前是歲

虜伐蒙為蒙所敗此龍孽之尤異者也 十一年四月

潭州衡山縣西北淨居岩有蛇長二丈身圓數尺黑巴

而方文震死山水大至先是山氣遇夜輒昏昧蛇斃而  
夜色始明 十六年温州平陽縣古剎老松有巢蛇食  
鸛鵲擊蛇蛇分三時黃岩縣蛇孽亦如之 二十五年

六月江州湖口縣有赤龍橫水中如山風濤大作寒風  
肅然覆舟數十艘士卒溺者數十人 三十年春撫州

宜黃縣有大蛇見於丞治長二丈捕之縱數里外俄復  
至者數四京房易傳曰蛇見於邑三年有大兵 孝宗  
乾道五年七月乙亥隆興府武寧縣龍鬬於西北大雨

俄頃迅雷起東南二龍奔逃墜珠如輪其地復塘村牧  
童得之是邑境連歲有水裁易坤上六龍戰于野文言  
曰陰疑于陽必戰與唐志天寶十四載同占春秋書龍  
鬪于洧淵亦水祥也 光宗紹熙五年七月辛酉饒州  
紫樞坊二犬共搏一蛇俄頃三者俱斃亦蛇孽也

魚異

周武王伐紂至孟津渡河中流白魚躍入王舟中

魚者介鱗

之物兵象也白者殷家之正色言殷之兵衆與周之衆也

武王俯取以祭

秦始皇八年河魚大上劉向以為近魚孽也時始皇弟

長安君將兵擊趙死屯留軍吏皆斬遷其民於臨洮

長安

君至此留而謀反乃賜死殺其兵遷其民

明年有嫪毐之誅魚陰類民象逆

流而上者民將不從其君令為逆行也在天文魚星中

河而處車騎滿野至於二世暴虐愈甚終用危亡京房

易傳曰衆逆同志厥妖河魚逆流上 三十七年東巡

並海上至之罘見巨魚射殺一魚

漢宣帝神爵元年幸河東祠后土東濟大河天氣清淨

神魚舞河 成帝鴻嘉四年秋雨魚於信都長五寸以  
下 永始元年春北海出大魚長六丈高一丈四枚  
哀帝建平三年東萊平度出大魚長八丈一尺七枚皆  
死京房易傳曰海數見巨魚邪人進賢人疎

後漢靈帝熹平二年東萊海出大魚二枚長八九丈高

二丈餘明年中山王暢任城王博並薨

京房易傳曰海出巨魚邪人進

賢人疎臣昭謂此占符靈帝之世巨魚之出宜為二王之妖也

魏齊王嘉平四年五月有二魚集於武庫屋上此魚孽



也王肅曰魚生於水而亢於屋介鱗之物失其所也邊  
將其殆有棄甲之變乎後果有東關之敗干寶以為高  
貴鄉公兵禍之應二說皆與班固旨同

晉武帝太康中有鯉魚二見武庫屋上干寶以為武庫  
兵府魚有鱗甲亦兵類也魚極陰屋上太陽魚見屋上  
象至陰以兵革之禍干太陽也至惠帝初誅楊駿廢太  
后矢交館閣元康末賈后謗殺太子尋亦誅廢十年之  
間母后之難再興是其應也自是禍亂構矣京房易傳

曰魚去水飛入道路兵且作

梁武帝大同十年帝幸朱方至四塹中及元武湖魚皆  
驤首見於上若望乘輿者帝入宮而沒洪範五行傳魚  
陰類也下人象又有鱗甲兵之應下人將舉兵圍宮而  
睥睨乘輿之象其後果有侯景之亂

後周靜帝大象元年六月陽武有鯉魚乘空而鬪猶臣  
下興起小人從之而鬪也明年帝崩國失政尉迥起兵  
相州高祖遣兵擊敗之

隋文帝開皇十七年大興城西南四里有袁村設佛會  
有老翁皓首白裙襦衣來食而去衆莫識追而觀之行  
二里許不復見但有一陂中有白魚長丈餘小魚從者  
無數人爭射之或弓折弦斷後竟中之剖其腹得杭飯  
始知此魚向老翁也後數日漕渠暴溢射人皆溺死  
煬帝大業十二年淮陽郡驅人入子城鑿斷羅郎郭至  
女垣之下有穴其中得鯉魚長七尺餘昔魏嘉平四年  
魚集武庫屋上王肅以為魚生於水而亢於屋水之物

失其所也邊將殆有棄甲之變後果有東關之敗是時  
長白山賊寇掠河南月餘賊至城下郡兵拒之反為所  
敗男女死者萬餘人

唐武后如意中濟源路敬淳家水碾柱將壞易之為薪  
中有鮎魚長尺餘猶生近魚孽也 中宗神龍中渭水  
有蝦蟆大如鼎里人聚觀數日而失歲大水 玄宗開  
元四年安南都護府江中有大蛇首尾橫出兩岸經日  
而腐寸寸自斷數日江魚盡死蔽江而下十十五五相

附著江水臭 憲宗元和十四年二月晝有魚長尺餘

墜於鄆州市良久乃死魚失水而墜於市敗滅之象也

文宗開成二年三月壬申有大魚長六丈自海入淮

至濠州招義民殺之近魚孽也 僖宗乾符六年汜水

河魚逆流而上至垣曲平陸界魚民象逆流而上民不

從君令也 光啓二年揚州雨魚占如元和十四年

宋太宗至道元年十二月廣州大魚擊海水而出魚死

長六丈三尺高丈餘 徽宗政和二年內出魚純赤色

蔡京等乞付史館拜表稱賀 七年夏中有二魚落殿

中省廳屋上 高宗建炎初越州應天寺有石眼纔方

數寸深不可探舊號鰻井有魚如鰻有鱗有耳尾有刃

跡每鰻出則郡有水旱癘疫近魚孽也 紹興十八年

漳州漳浦縣崇照鹽場海岸連有巨魚高數丈旁海人

割取肉數百車至剜目乃覺轉鬣而旁艦皆覆又漁人

獲魚長二丈餘重數千斤剖之腹橫人髀膚髮如生京

房易傳曰海見巨魚邪人進賢人疎 二十年四月秀

州海鹽縣海洋有巨鰐羣鰐從之聲如謳歌抵岸偃沙  
上猶揚髻撥刺其高齊縣門樓其長百丈縣民鬻肉轉  
鬻壓死十數人頷骨長二丈五尺與前孽同占 孝宗


乾道六年行都北關有鮎魚色黑腹下出人手於兩旁  
各具五指 七年十一月丁亥洞庭湖巨黿走沙擁舟  
身廣長皆丈餘升舟以首足壓重艦沒水 淳熙十三

年二月庚申錢塘龍山江岸有大魚如象隨潮汐復逝  
十六年六月甲辰錢塘旁江居民得魚備五色鯽首

鯉身民詭言夢得魚覺而在手猶躍事聞有司令縱之  
寧宗慶元三年二月饒州景德鎮漁人得魚頰尾鯉  
鱗而首異常魚鎮之老人言其不祥紹興二年嘗出後  
為水災蓋是歲五月鎮果大水皆魚孽也 嘉定十七  
年海壞畿縣鹽官地數十里先是有巨魚橫海岸民鬻  
食之海患凡六年而平

文獻通考卷三百十三





總校官庶吉士 臣張能照

校對官檢討 臣盧應

謄錄監生 臣趙立福

欽定四庫全書薈要

史部

文獻通考卷三百十四



欽定四庫全書薈要卷九千六百三十六

史部

文獻通考卷三百十四

鄱陽馬端臨貴與著

物異考二十

龜異

禹治水時神龜自洛出負文而列於背赤文朱字其數皆九禹因而第之以為九疇

宋元王二年江使神龜於河至於泉陽漁者豫且舉

網得而囚之

索隱曰且音子余切  
泉陽人網元龜者

置於籠中夜半龜

來見夢於宋元王曰我為江使於河而幕網當吾路

泉陽豫且得我我不能去身在患中莫可告語王有

德義故來告訴元王惕然而悟乃召博士衛平而問

之

索隱曰宋元  
君之臣也

曰今寡人夢見一丈夫延頸而長頭

衣玄繡之衣而乘輜車來見夢於寡人曰我為江使

於河而幕網當吾路泉陽豫且得我我不能去身在

患中莫可告語王有德義故來告訴是何物也衛平

乃援式而起

徐廣曰式音勅

仰天而視月之光觀斗所指定

日處鄉規矩為輔副以權衡四維已定八卦相望視

其吉凶介蟲先見乃對元王曰今昔壬子

索隱曰今昔猶昨夜

也以今日言之謂昨夜為今昔

宿在牽牛河水大會鬼神相謀漢正

南北

正義曰漢天河

江河因期南風新至江使先來白雲壅

漢萬物盡留斗柄指日使者當囚玄服而乘輜車其

名為龜王急使人問而求之王曰善於是王乃使人

馳而往問泉陽令曰漁者幾何家名誰為豫且豫且

得龜見夢於王王故使我求之泉陽令乃使吏按籍  
視圖水上漁者五十五家上流之廬名為豫且泉陽  
令曰諾乃與使者馳而問豫且曰今昔汝漁何得豫  
且曰夜半時舉網得龜

莊子曰得白  
龜圓五尺

使者曰今龜安

在曰在籠中使者曰王知子得龜故使我求之豫且  
曰諾即系龜而出之籠中獻使者使者載行出於泉  
陽之門正晝無見風雨晦冥雲蓋其上五采青黃雲  
雨並起風將而行入於端門見於東廂身如流水潤

澤有光望見元王延頸而前三步而止縮頸而卻復其故處元王見而怪之問衛平曰龜見寡人延頸而前以何望也縮頸而復是何當也衛平對曰龜在患中而終昔囚王有德義使人活之今延頸而前以當謝也縮頸而卻欲急去也元王曰善哉神至於此乎不可久畱趣駕送龜勿令失期衛平對曰龜者是天下之寶也先得此龜者為天子且十言十當十戰十勝生於深淵長於黃土知天之道明於上古游三千

歲不出其域安平靜正動不用力壽蔽天地莫知其  
極與物變化四時變色居而自匿伏而不食春倉夏  
黃秋白冬黑明於陰陽審於刑德先知利害察於禍  
福以言而當以戰而勝王能寶之諸侯盡服王勿遣  
也以安社稷元王曰龜甚神靈降於上天陷於深淵  
在患難中以我為賢德厚而忠信故來告寡人寡人  
若不遣也是漁者也漁者利其肉寡人貪其力下為  
不仁上為無德君臣無禮何從有福寡人不忍奈何



不遣衛平對曰不然臣聞盛德不報重寄不歸天與  
不受天奪之寶今龜周流天下還復其所上至蒼天  
下薄泥塗還徧九州未嘗愧辱無所稽留今至泉陽  
漁者得而囚之江河必怒務求報仇自以為侵因神  
與謀淫雨不霽水不可治若為枯旱風而揚埃蝗蟲  
暴生百姓失時王行仁義其罰必來此無他故其崇  
在龜後雖悔之豈有及哉王勿遣也於是元王向日  
而謝

索隱曰蓋欲神之以謝天之賜向日者天之光明著見者也

再拜而受擇日

齋戒甲乙最良乃刑白雉及與驪羊以血灌竈於壇

中央以刀剝之身全不傷脯酒禮之橫其腹腸荆支

卜之必制其創理達於理文相錯迎使工占之所言

盡當邦福重寶

徐廣曰福音副藏也

聞於傍鄉殺牛取革被鄭

之桐

徐廣曰牛革桐為鼓也

草木畢分化為甲兵戰勝攻取莫

如元王元王之時衛平相宋宋最彊龜之力也故云

神至能見夢於元王而不自出漁者之籠身能十言

盡當不能通使於河還報於江賢能令人戰勝攻取

不能自留於刀鋒免剝刺之患聖能先知亟見而不能令衛平無言

魏陳留王咸寧二年二月胸臆縣獻靈龜歸於相府

晉咸康中豫州刺史毛寶戍邾有一軍人於武昌市買得白龜長五尺置瓮中養之漸大放江中後邾城遭石虎攻陷赴江者莫不沈溺所養龜人被甲投水中覺如墮一石上須臾視之乃是先所放白龜既抵岸迴顧而去

符堅時高陸人穿井得龜大三尺皆有八卦堅命太  
卜池養之食之以粟後死藏其骨於太廟其夜廟丞  
高虜夢龜謂之曰我本出將歸江南遭時不遇殞命  
秦庭又有人夢中謂虜曰龜三千六百歲而終終必  
妖興亡國之徵也

隋文帝開皇中掖庭宮每夜有人來挑宮人宮司以聞  
帝曰門衛甚嚴人何從入當是妖精耳因戒宮人曰若  
逢但斬之其後有物如人來登床宮人抽刀斬之若中

枯骨其物落床而走宮人逐之因入池而沒明日帝涸池得一龜徑尺餘上有刀跡殺之遂絕龜者水居而靈陰謀之象晉王諂媚宮掖求嗣之應云

唐武后大足初虔州獲龜六眼一夕而失 肅宗上元二年有鼃聚於揚州城門上節度使鄧景山以問族弟珽對曰鼃介物兵象也 德宗貞元三年潤州魚鼃蔽江而下皆無首 文宗太和三年魏博管內有蟲狀如龜其鳴晝夜不絕近龜孽也

秦宗權在蔡州州中忽地裂有石出高五六尺廣袤  
丈餘正如大龜

宋太宗太平興國二年二月鑿金明池既掘地有龜出  
殆踰萬數 太平興國間永州益州饒州萬安永州新

州俱獻六目龜廬州獻龜大如掌綠毛覆甲潤澤可愛  
蘇州獻白龜大如錢其色瑩潔兗州衛州獻金龜

餘不  
及錄

真宗大中祥符二年四月有黑龜甚衆沿汴水下龜  
介族黑北方色是歲契丹國母卒 仁宗至和元年二

月癸亥信州貢綠毛龜 嘉祐八年十月鼎州芝草叢

生下得異龜 徽宗大觀元年閏十月丙戌都水使者

趙震行河得兩首龜以為瑞蔡京信之曰此齊小白所  
謂象罔見之而霸者也鄭居中曰首豈容有二而京主  
之意不可測命棄龜 政和四年端州進六目龜 五

年博州進白龜 宣和四年雄州地大震元武見於州

之正寢有龜大如錢蛇若朱漆筋相逐而行宣撫焚香

再拜以銀奩貯二物俄而死 高宗紹興八年五月汴

京太康縣大雷雨下冰龜數十里隨大小皆龜形具手足卦文龜猶歸也龜又介物兵象也冰有消釋之象此汴京將復歸而釋兵也時秦檜主和議罷兵自是神州陸沈 孝宗乾道五年舒州民獻龜駢生二首不能伸縮郡守張棟縱之潛山近龜孽也 寧宗嘉定十四年春楚州境上龜大小死者蔽野後十年歸正人李全叛死又龜者介蟲也是時被介胄死者何可勝數

蟲異



漢武帝元鼎五年秋蛙與蝦蟇羣鬪時四將軍衆十萬

征南越開九郡

蛙黽也似蝦蟇而長脚其色青

元帝建昭元年八月

有白蛾羣飛蔽日從東都門至軹道

師古曰蛾成羣若今之蠶蛾類是也

成帝建始元年六月有青蠅無萬數

言其極多雖欲以萬數之而不

可集未央宮殿中朝者坐

公卿以下朝會坐也

後漢光武建武三年野蠶成繭

吳孫權黃龍二年有野蠶成繭如卵

晉武帝太康四年會稽彭蠡及蟹皆化鼠甚衆復大食

稻為災 惠帝元康中洛陽南山有蚩

武庚反

作聲曰韓

尸尸識者曰韓氏將尸也言尸尸者盡死也其後韓謚誅而韓族殲焉此青祥也

苻堅將為赦與王猛苻融密議於露堂悉屏左右堅親為赦文猛融供進紙墨有一大蒼蠅自牖間鳴聲甚大集於筆端驅而復來俄而長安街巷市里人相告曰官今大赦有司以聞堅謂融猛曰禁中無耳屬之理事何從泄也於是敕外窮推之咸言有一小兒

衣黑衣大呼於市曰官今大赦須臾不見堅歎曰其  
蒼蠅乎聲狀非常吾固惡之

梁武帝天監十一年新昌濟陽二郡野蠶成繭 太清  
二年益州市有飛螽萬羣螫人死

周靜帝大象元年八月所在螳羣鬪各四五尺死十七  
八

唐太宗貞觀十二年六月滁州言野蠶成繭於山阜  
十三年野蠶食榭葉成繭大如柰其色綠凡收六千五

百七十石至十四年又收八千三百石 玄宗天寶五

載九月太原奏文水縣冬蠶成繭 德宗貞元十四年

四月江西溪澗魚頭皆戴蚯蚓 穆宗長慶四年五月

淄青奏登州蓬萊山谷間約四十里野蠶成繭其絲可

織 文宗太和元年鄭注篋中藥化為蠅數萬飛去十

月陳許奏界內野蠶自生桑上三遍成繭連綿九十里

百姓收拾得並抽繅得絲綿并織成綢絹 開成二年

京城有蟻聚長五六十步闊五尺至一丈厚五寸至一

尺

宋太祖乾德四年八月京兆府野蠶成繭其絲纖潤可  
愛 開寶六年漢陽軍獻蛤有文隱起成龍長五寸許  
金色鱗甲皎然 七年正月齊州獻野蠶繭二萬枚五  
月開封府封丘縣民程鐸家發蠶簇有繭聯屬自成被  
七月開封府陽武縣民家野蠶成繭 真宗大中祥符  
元年五月開封府酸棗縣民程矩家蠶繭自成被色輕  
重密緻柔滑非人功可及 五年五月滕州鐸津縣野

蠶成繭是州不產絲蠶此食山柘而成緘絲以獻 六

年八月亳州譙縣民李賁園桑野蠶成繭奉祀經度制  
置使丁謂采蠶繰漚絮以獻 仁宗景祐四年五月滑

州靈河縣民黃慶家蠶自成被長二丈五尺闊四尺

嘉祐二年十月深州言野蠶成繭被於原野 哲宗元

祐六年閏八月定州七縣野蠶成繭 七年五月濰州

北海縣蠶自織如絹成領帶 元符元年七月真定府

藁城縣野蠶成繭八月真定府行唐縣野蠶成繭九月

祁州深澤縣野蠶成繭織絰成萬疋 二年六月房州  
房陵縣野蠶成繭 徽宗政和元年九月河南府野蠶  
成繭 四年湘州野蠶成繭 五年南京野蠶成繭織  
紬五疋綿四十兩聖繭十五兩

蝗蟲

蜚

蝻

蝻

春秋桓公五年秋螽

師古曰螽即阜螽即今之蝗蟲也螽音終蝗音之庸反

劉歆

以為貪虐取民則螽介蟲之孽也與魚同占劉向以為  
介蟲之孽屬言不從是歲公獲二國之聘取鼎易邑

師古

曰二國宋鄭也宋以郕鼎賂公鄭以泰山之田易許田也

興役起城

師古曰謂五年夏城祝邱也

諸蝨畧皆從董仲舒說云 莊公二十九年有蜚劉歆

以為負蟊也性不食穀食穀為災介蟲之孽

師古曰蜚音扶味反

蟊音頌

劉向以為蜚色青近青青也非中國所有南越盛

暑男女同川澤淫風所生為蟲臭惡

師古曰蜚者中國所有非南越之蟲

朱詳向所說

是時莊公取齊淫女為夫人既入淫於兩叔故

蜚至天戒若曰今誅絕之尚及不將生臭惡聞於四方

莊不悟其後夫人與二叔作亂二嗣以殺

師古曰二嗣謂子般及閔



公卒皆被辜

師古曰謂二叔哀姜皆不得其死也已解於上

董仲舒指畧同

僖公十五年八月螽劉向以為先是僖有鹹之會後城

緣陵是歲復以兵為壯丘會使公孫敖帥師及諸大夫

救徐兵比三年在外 文公三年秋雨螽于宋劉向以

為先是宋殺大夫而無罪有暴虐賦斂之應穀梁傳曰

上下皆合言甚

上下皆合螽之多

董仲舒以為宋三世內取

三世

謂襄成胎也內取於國之大夫也取讀曰娶

大夫專恣殺生不中故螽先死

而至劉歆以為螽為穀災卒遇賊陰墜而死也 八年

十月螽時公伐邾取須朐城郛 宣公六年八月螽劉

向以為先是宣伐莒向後比再如齊謀伐萊 十三年

秋螽公孫歸父會齊伐萊 十五年秋螽宣亡熟歲數

有軍旅冬螽生 師古曰爾雅曰螽蝗之類螽音蒲北反螽徒高反 劉歆

以為螽蟪蠹之有翼者 孟康曰螽蟪音毗蟪 食穀為歲黑胥也董

仲舒劉向以為螽蟪始生也 一曰蟪始生是時民患上

力役解於公田 解讀 宣是時初稅畝稅畝就民田畝擇

美者稅其什一亂先王制而為貪利故應是而螽生屬

羸蟲之孽 襄公七年八月螽劉向以為先是襄興師

救陳滕子邾子小邾子皆來朝夏城費 哀公十二年

十二月螽是時哀用田賦

師古曰言重斂也解在刑法志

劉向以為春

用田賦冬而螽 十三年九月螽十二月螽比三螽虐

取於民之效也

師古曰比類也

劉歆以為周十二月夏十月也

火星既伏蟄蟲皆畢天之見變因物類之宜不得以螽

是歲再失閏也周九月夏七月故傳曰火猶西流司歷

過也

秦始皇四年十月蝗蟲自東方來蔽天

漢景帝中三年秋蝗先是匈奴寇邊中尉不害

魏不害

將

車騎材官士屯高柳

四年夏蝗

武帝建元五年五

月大蝗

元光五年秋蝗

六年秋蝗先是五將軍衆

三十萬伏馬邑欲襲單于是歲四將軍征匈奴

元鼎

五年秋蝗是歲四將軍征南粵及西南夷開十餘郡

元封六年秋蝗先是兩將軍征朝鮮開三郡

太初元

年夏蝗從東方飛至燉煌

三年秋復蝗元年貳師將

軍征大宛天下奉其役連年 征和三年秋蝗 四年

夏蝗先是一年三將軍衆十餘萬征匈奴貳師七萬人  
沒不還 平帝元始二年秋蝗徧天下時王莽秉政

王莽地皇三年夏蝗從東方來蜚蔽天至長安入未  
央宮緣殿閣草木盡

後漢光武二十八年郡國共八十蝗 二十九年四月  
威武酒泉清河京兆魏郡弘農蝗 三十一年郡國大  
蝗 明帝永平四年酒泉大蝗從塞外入 十五年蝗

起泰山彌行兗豫 和帝永元四年蝗 八年五月河

內陳畱蝗九月京都蝗 九年蝗從夏至秋先是西羌

數反遣將軍將北軍五校征之 安帝永初四年夏蝗

是時西羌寇亂軍衆征距連十餘年 識曰主失禮煩苛則旱之魚螺變為

蝗 京房占曰天生萬物百穀以給民 五年夏九州蝗 用天地之性人為貴今蝗蟲四起

此為國多邪人朝無忠臣蟲與民爭食居位食祿如蟲矣不救致兵起其救也舉有道置於位命諸侯試明經

此消 六年三月去蝗處復蝗子生 古今註曰郡國四十八蝗 七

年夏蝗 元初元年夏郡國五蝗 二年夏郡國二十

蝗 延光元年六月郡國蝗 順帝永建五年郡國十

二蝗是時鮮卑寇朔方用衆征之 永和元年秋偃師

蝗去冬烏桓寇沙南用衆征之 桓帝永興元年七月

郡國三十二蝗是時梁冀秉政無謀獻苟貪權作虐

春秋

考異邳曰  
貪擾生蝗

二年六月京都蝗 永壽三年六月京都

蝗 延禧元年五月京都蝗

臣昭按劉歆傳皆逆天時  
聽不聽之禍也養奮對策

曰倭邪以不正食祿饗所致謝沈書  
曰九年揚州六郡連水旱蝗害也

靈帝熹平六年

夏七州蝗先是鮮卑前後三十餘犯塞是歲護烏桓校

尉夏育破鮮卑中郎將田晏使匈奴中郎將臧旻將南  
單于以下三道並出討鮮卑大司農經用不足殷斂郡  
國以給軍糧三將無功還者少半光和元年詔策問曰  
連年蝗蟲至冬踊其咎焉在蔡邕對曰臣聞易傳曰大  
作不時天降災厥咎蝗蟲來河圖祕徵篇曰帝貪則政  
暴而吏酷酷則誅深必殺主蝗蟲蝗蟲貪苛之所致也  
是時百官遷徙皆私上禮西園以為府

蔡邕對曰蝗蟲  
出息不急之作

省賦斂之費進清廉黜貪虐分損承安屈省別藏以贍  
國用則其救也易曰得臣無家言有天下者何私家之



有

獻帝興平元年夏大蝗是時天下大亂 建安二

年五月蝗

魏文帝黃初三年七月冀州大蝗人饑按蔡邕說蝗者在  
上貪苛之所致也是時孫權歸順帝因其有西陵之  
役舉大衆襲之權遂背叛也

晉武帝泰始十年六月蝗是時荀賈任政疾害公直

惠帝永寧元年郡國六蝗 懷帝永嘉四年五月大蝗

自幽并司冀至於秦雍草木牛馬毛鬣皆盡是時天下

兵亂漁獵黔黎存亡所寄惟司馬越苟晞而已競為暴  
刻經畧無章故有此孽 愍帝建興四年五月大蝗去  
歲劉曜頻攻北地馮翊趙允等悉衆禦之卒為劉曜所  
破西京遂潰 五年帝在平陽司冀青雍蝨 元帝太  
興元年六月蘭陵合鄉蝗害禾稼乙未東莞蝗蟲縱橫  
三百里害苗稼七月東海彭城下邳淮西郡蝗蟲害禾  
豆八月冀青徐三州蝗食生草盡至於二年是時中州  
淪喪暴亂滋甚也 二年五月淮陵臨淮淮南安豐廬

江等五郡蝗蟲食秋麥是月癸丑徐州及揚州江西諸郡蝗吳郡百姓多餓死去年王敦并領荊州苛暴之釁自此興矣 孝武帝太元十五年八月兖州蝗是時慕容氏逼河南征戍不已故有斯孽 十六年五月飛蝗從南來集堂邑縣界害苗稼是年春發江州兵營甲士三千人家口六七千配護軍及東宮後尋散亡殆盡又邊將連有征役故有斯孽

劉聰末年河東大蝗唯不食黍豆靳準率部人收而

埋之哭聲聞於十餘里後乃鑽土飛出復食黍豆  
石虎時河朔大蝗初穿地而生二旬則化狀若蠶七  
八日而臥四日蛻而飛彌亘百草唯不食三豆及麻  
苻健時蝗蟲大起自華陰至隴山食百草無遺牛馬  
相噉毛

宋文帝元嘉三年秋旱且蝗

梁武帝大同初蝗離門松栢葉皆盡京房易飛候曰食  
祿不益聖化天視以蟲蟲無益於人而食萬物也時公

卿皆以虛澹為美不親職事無益食物之應也

北齊文宣天保八年河北六州河南十二州蝗畿人皆  
祭之時外築長城內修三臺役者不止九年山東又  
蝗十年幽州大蝗河清二年并汾晉東雍南汾五  
州蟲旱傷稼

後周武帝建德二年關中大蝗

隋文帝開皇十六年并州蝗時秦孝王俊哀刻百姓盛  
修邸第後獲譴死

唐高祖武德六年夏州蝗蝗之殘民若無功而祿者然  
皆貪撓之所生先儒以為人主失禮煩苛則旱魚螺變  
為蟲蝗故以為魚孽 太宗貞觀二年六月京畿旱蝗  
太宗在苑中掇蝗祝之曰人以穀為命百姓有過在予  
一人但當蝕我無害百姓將吞之侍臣懼帝致疾遽以  
為諫帝曰所冀移災朕躬何疾之避遂吞之是歲蝗不  
為災 三年五月徐州蝗秋德戴廓等州蝗 四年秋  
觀兗遼等州蝗 二十一年秋渠泉二州蝗 高宗永

徽元年夔絳雍同等州蝗秋陳州蝗 永淳元年三月

京畿蝗無麥苗六月雍岐隴等州蝗 武后長壽二年

台建等州蝗 玄宗開元三年七月河南河北蝗 四

年夏山東蝗食稼聲如風雨 二十五年貝州蝗有白

鳥數千萬羣飛食之一夕而盡禾稼不傷 代宗廣德

二年秋蝗關輔尤甚斗米千錢 德宗興元元年秋螟

蝗自山而東際於海晦天蔽野草木皆盡 貞元元年

夏蝗東自海西盡河隴羣飛蔽天旬日不息所至草木

葉及畜毛靡有子遺餓殣枕道民蒸蝗曝颺去翅足而食之 憲宗元和元年夏鎮冀等州蝗 穆宗長慶三

年秋洪州螟蝗害稼八萬頃 文宗開成元年夏鎮州

河中蝗害稼 二年六月魏博昭義淄青滄州兗海河

南蝗 三年秋河南河北鎮定等州蝗草木葉皆盡

五年夏幽魏博鄆曹濮滄齊德淄青兗海河陽淮南虢

陳許汝等州螟蝗害稼占曰國多邪人朝無忠臣居位

食祿如蟲與民爭食故比年蟲蝗 武宗會昌元年七



月關東山南鄧唐等州蝗 宣宗大中八年七月劔南

東川蝗 懿宗咸通三年六月淮南河南蝗 六年八

月東都同華陝虢等州蝗 七年夏東都同華陝虢及

京畿蝗 九年江淮關內及東都蝗 十年夏陝虢等

州蝗不絀無德虐取於民之罰 僖宗乾符二年蝗自

東而西蔽天 光啓元年秋蝗自東方來羣飛蔽天

二年荆襄蝗斗米錢三千人相食淮南蝗自西來行而

不飛浮水緣城入揚州府署竹樹幢節一夕如剪幡幟

畫像皆齧去其首撲不能止旬日自相食盡

後梁太祖開平元年六月許陳汝蔡潁五州蝥生有野禽羣飛蔽空食之皆盡

後唐莊宗同光三年九月鎮州奏飛蝗害稼

晉高祖天福七年四月山東河南關西諸郡蝗害稼至八年四月天下諸道州飛蝗害稼草木葉皆盡詔州縣長吏捕蝗華州節度使楊彥珣雍州節度使趙瑩命百姓捕蝗一斗以祿粟一斗賞之

時蝗旱相繼人民流遷餓者盈路關西餓殍尤

甚死者十有七八朝廷以軍食不充分  
命使臣諸道括借粟麥晉氏自此衰矣

後漢隱帝乾祐元年七月青鄆兗齊濮沂密邢曹皆言  
蝥生開封府奏陽武雍丘襄邑等縣蝗開封尹侯益遣  
人以酒肴致祭尋為鸛鵒食之皆盡

勅禁羅弋鸛鵒以其有吞蝗之異也

二年五月博州奏有蝥生化為蝶飛去宋州奏蝗一  
夕抱草而死差官祭之復命尚書侍郎段希堯祭東嶽  
太府卿劉皞祭中嶽皆慮蟲螟為災故也

宋太祖建隆元年七月澶州蝗 二年五月濮州范縣

蝗 三年七月兗濟德磁洺五州有蝻生真定府深州

蝻蟲生 四年六月澶濮曹絳等州有蝗懷州蝗生

乾德二年四月相州蝻蟲食桑五月趙州昭慶縣有蝗

東西四十里南北二十里是夏河南河北陝西諸州皆

蝗 三年七月諸路有蝗淄州民韓贊斷手指以祭

開寶二年八月真定府冀磁州蝗 太宗太平興國二

年六月磁州有黑蟲羣飛食桑夜出晝隱食葉殆盡閏

七月衛州蝻蟲生 六年七月河南府宋州蝗 七年

四月唐州比陽縣蝻蟲生有飛鳥食之盡河南府滑州

蝻蟲生五月大名府陝州陳州蝗七月鄆州陽穀縣蝻

蟲生 九年七月泗州螻蟲食桑 雍熙二年四月天

長軍螻蟲食苗 三年七月濮州鄆城縣有蝗俄自死

淳化元年四月鄆州中都縣蝻蟲生七月單州碭山

縣蝗曹州濟陰縣有蝗自北來飛亘天有聲 二年三

月亳州蝻蟲生遇雨而死六月淄澶濮州乾寧軍並蝗

生七月寧邊軍有蛤滄州蝻蟲食苗棣州有飛蝗自北

來害稼 三年六月甲申京師有蝗起東北趣西南蔽

空如雲翳日七月貝許滄沂蔡汝商兗單等州淮陽平

定靜戎軍蝗俄抱草自死 至道二年六月亳宿密州

蝗生食苗七月許州長葛陽翟二縣有蝻蟲食苗齊州

歷城長清等縣有蝗 三年七月單州蝻蟲生 真宗

景德元年八月陝濱棣州蟲害稼 二年六月京東諸

州蝻蟲生 三年八月德博州蝻生 四年九月陳州

宛丘縣鄆州東阿須城二縣蝗 大中祥符二年五月

雄州蝻蝗食苗 三年六月開封府咸平尉氏二縣蝻

蟲生 四年六月開封府祥符縣有蝗七月河南府及

京東蝗生食苗葉八月開封府祥符咸平中牟陳畱雍

丘封丘六縣蝗生 九年六月京畿京東西河北路蝗

蝻繼生彌覆郊野食民田殆盡入公私廬舍七月辛亥

過京師羣飛翳空至淮南趣河東及霜寒始斃 天禧

元年二月開封府京東西河北河東陝西江淮兩浙荆

湖百三十州軍蝗蝻復生多去歲蟄者和州蝗生卵如

稻粒而細六月江淮大風多吹蝗入江海或抱草木僵

死二年四月江陰軍蟪蟲生仁宗天聖五年七月

丙午邢洺州蝗甲寅趙州蝗不食苗是歲京兆府旱蝗

六年五月己卯河北京東蝗明道元年十月中甲

寅濠州蝗二年七月庚辰開封界京東西河北河東

陝西蝗景祐元年六月乙卯開封府淄州蝗諸路募

民掘蝗子萬餘石寶元元年六月曹濮單三州蝗

慶歷四年春淮南旱蝗京師飛蝗蔽天神宗熙寧元



年秀州蝗 五年河北大蝗 六年四月河北諸路蝗

是歲江寧府飛蝗自江北來 七年夏開封府界及河

北路蝗七月咸平縣鸚鵡食蝗 八年八月淮西蝗陳

潁州蔽野 九年夏開封府畿京東河北陝西蝗五月

京湖南路地生黑蟲化蛾飛去全州生黑蟲食苗黃雀

來食之皆盡 元豐四年六月河北蝗秋開封府界蝗

五年夏又蝗 六年夏又蝗 五年沂州蝗 哲宗

元符元年八月高郵軍言飛蝗抱草死 徽宗崇寧元

年夏開封府界京東河北淮南等路蝗 二年諸路蝗

令有司酺祭 三年四年連歲大蝗其飛蔽日來自山

東及府界惟河北尤甚 宣和三年諸路蝗 高宗建

炎二年六月京師淮甸大蝗令長吏修酺祭 紹興二

十九年七月盱眙軍楚州處界三十里蝗為風所墜風  
止復飛回淮北金知天佑自是不敢築 三十二年六

月江東淮南北郡國蝗飛入湖州境聲如風雨自癸巳  
至於七月丙申飛徧畿縣餘杭仁和錢塘皆蝗丙午蝗

入京城八月山東大蝗

江淮諸道乏食令發廩萬石以賑

癸丑頒祭酺

禮式

孝宗隆興元年七月大蝗

辛丑詔羣臣言闕失八月丙子上升次貶

食詔諸道暴察冤賑災蠲賦重匿災之罰休息江淮襄蜀科調民忘凶年

八月壬申癸酉飛

蝗過都蔽天日徽宣湖三州及浙東郡縣害稼

遂下捕蝗之令

九月京東大蝗襄隨蝗甚民為乏食

二年夏畿縣餘

杭大蝗

令漕臣察獄浹捕

乾道元年六月淮西蝗憲臣姚岳

貢死蝗為瑞上斥其佞坐黜

淳熙三年八月淮北飛

蝗楚州盱眙軍界如雲陣風雷者逾時遇大雨皆死稼

用不害 九年六月滁州全椒縣和州歷陽烏江縣蝗

乙卯飛蝗過都遇大雨墮仁和界蘆蕩茅穗

令徙瘞之

七月

淮甸大蝗其揚泰州害撲蝗五千斛餘郡或日捕數十

車羣飛絕江鹽鎮江府皆害稼

令淮浙郡國捕除

十年六月

淮浙舊蝗遺有害稼 十四年七月畿縣仁和蝗

蝗始生令

捕除之  
不為災

光宗紹熙二年七月泰州蝗自高郵縣 五

年八月楚和州蝗

寧宗嘉泰二年浙西大蝗自丹陽

入武進若煙霧蔽天其墮亘十餘里常之三縣捕八千

餘石湖之長興捕數百石時浙東近郡亦蝗 開禧三

年夏秋旱大蝗羣飛蔽天先是浙西郡縣首種不入或

種豆粟皆既於蝗漢志言魯宣公秋蟲以為宣無熟歲

數有軍旅又漢武帝比年秋蝗興師征四夷之應時韓

侂冑開邊兵禍連結故有此孽也 嘉定元年五月江

浙大蝗 乙丑上懼災損膳露禱 六月乙酉有事於園丘方澤且祭

酺七月又酺放酺式於郡國 二年四月又蝗 下捕蝗令 五

月丁酉令諸郡修酺祀六月辛未飛蝗入畿縣 令守臣修酺祭

七年六月浙郡蝗 八年四月北境飛蝗越淮而南

江淮郡蝗食禾苗山林草木皆盡乙卯飛蝗入畿縣已

亥祭酺令蝗郡如式以祭是歲自夏徂秋蝗患不息諸

道捕蝗者以千萬石計饑民競捕官以粟易之 九年

五月浙東蝗丁巳令郡國酺祭令諸道部使是歲薦饑

官以粟易蝗者計千百斛及冬校比而賞罰之十年四月楚州

蝗

螟 野 蚘 蟲

春秋隱公五年秋螟董仲舒劉向以為時公觀漁於棠  
貪利之應也劉歆又以為逆臧僖伯之諫貪利區霧以  
生羸蟲之孽也 八年九月螟時鄭伯以邴將易許田  
有貪利心京房易傳曰臣安祿茲謂貪厥災蟲蟲食根  
德無常茲謂煩蟲食葉不絀無德蟲食本與東作爭茲  
謂不時蟲食節蔽惡生孽蟲食心 莊公二年秋螟董  
仲舒劉向以為先是衛侯朔出奔齊齊侯會諸侯納朔  
許諸侯賂齊人歸衛寶魯受之貪利應也

漢文帝後六年秋螟是歲匈奴大入上郡雲中烽火通  
長安遣三將軍屯邊三將屯京師

後漢章帝七八年間郡縣大螟傷稼

輶在魯恭傳而紀不錄

時章

帝用竇皇后讒害宋梁二貴人廢皇太子 靈帝熹平

四年六月弘農三輔螟蟲為害時靈帝用中常侍曹節  
等讒言禁錮名士謂之黨人 中平二年七月三輔螟

蟲為害

晉武帝咸寧元年七月郡國螟九月青州又螟是月郡



國有青蟲食禾稼 四年司冀兗豫荆揚郡國二十螟

九年八月郡國二十四螟九月蟲又傷秋稼時帝聽  
讒諛寵任賈充楊駿故有蟲蝗之災不紂無德之罰

惠帝元康三年九月帶方等六縣螟食禾葉盡 永寧

元年七月梁益涼三州螟時齊王冏執政貪苛之應十  
月南安巴西江陽太原新興北海青蟲食禾葉甚者十  
傷五六十月郡國六螟

唐太宗貞觀二十一年八月萊州螟 玄宗開元二十

一年八月榆關野蚘蟲害稼入平州界有羣雀來食之

一日而盡 二十六年榆關野蚘蟲害稼羣雀來食之

天寶三載青州紫蟲食田有鳥食之 代宗廣德元

年秋野蚘蟲害稼關中尤甚斗粟千錢 穆宗長慶四

年絳州野蚘蟲害稼 文宗太和元年秋河東同虢等

州野蚘蟲害稼 四年河南黑蟲食田

宋太祖建隆二年九月華州渭南縣野蚘蟲害稼 乾

德六年七月階州野蚘蟲生 太宗太平興國二年七

月邢州鉅鹿沙河二縣步屈蟲食桑麥殆盡 五年七

月濰州𧈧𧈧蟲食稼殆盡 七年九月邠州𧈧𧈧蟲生

食稼 端拱二年七月施州𧈧𧈧蟲生害稼 真宗大

中祥符四年八月兗州𧈧𧈧蟲生有蟲青色隨齧之化

為水 仁宗天聖五年五月戊辰磁州蟲食桑 六年

庚戌同華等州旱𧈧𧈧蟲食苗 高宗紹興元年秋紹

興府湖州螟浙東西郡國螟多為穀災 二年台州螟

二十九年秋浙東江東西郡縣螟 三十年十月江

浙郡國螟螣 孝宗乾道三年八月江東郡縣螟螣淮

浙諸路多以青蟲食穀穗為災 六年秋浙西江東螟

蟲為害 九年秋吉贛州臨江南安軍皆有螟 淳熙

二年秋浙江淮郡縣間有螟害 四年秋昭州螟 五

年昭州薦有螟螣 七年秋永州螟 八年秋江州螟

十二年八月平江府有蟲聚於禾穗惟油可墮一夕

大雨盡滌 十四年秋江州興國軍螟 十六年秋溫

州螟 寧宗慶元三年秋浙東蕭山山陰縣婺州浙西

富陽鹽官淳安永興縣嘉興府皆螟 四年秋江東鉛

山縣蟲食穀田無遺穗 嘉定十四年明台溫婺衢蟲

蝻為災 十五年秋贛州螟 十六年秋永道州螟

### 鼠妖

春秋成公七年正月鼯鼠食郊牛角

師古曰鼯小鼠也即今所謂甘鼠者

音奚改卜牛又食其角劉向以為近青祥亦牛禍也不敬

而備霧之所致也昔周公制禮樂成周道故成王命魯郊祀天地以尊周公至成公時三家始顓政魯將從此

衰天愍周公之德痛其將有敗亡之禍故於郊祭而見  
或云鼠小蟲性盜竊鼯又其小者也牛大畜祭天尊物  
也角兵象在上君威也小小鼯鼠食至尊之牛角象季  
氏乃陪臣盜竊之人將執國命以傷君威而害周公之  
祀也改卜牛鼯鼠又食其角天重語之也

重音直  
用反

成公

怠慢昏亂遂君臣更執於晉至於襄公晉為溴梁之會

天下大夫皆奪其君政

溴梁之會諸侯皆在而魯叔孫  
豹晉荀偃宋向戌衛甯殖鄭公

孫蠆小邾之大夫  
盟是奪其君政也

其後三家逐昭公卒死於外幾絕周

公之祀董仲舒以為鼯鼠食郊牛皆養牲不謹也京房  
易傳曰祭天不謹厥妖鼯鼠齧郊牛角 定公十五年

正月鼯鼠食郊牛牛死劉向以為定公知季氏逐昭公  
罪惡如彼親見孔子為夾谷之會齊人歸郛謹龜陰之  
田聖德如此反用季桓子淫於女樂而退孔子無道甚  
矣是歲五月定公薨牛死之應京房易傳曰子不子鼠  
食其郊牛 哀公元年正月鼯鼠食郊牛劉向以為天  
意汲汲於用聖人逐三家故復見戒也哀不寤身奔於

越

漢昭帝元鳳元年九月燕有黃鼠啣其尾舞王宮端門

中宮之正門王往視之鼠舞如故王使吏以酒脯祠舞不休

一日一夜死近黃祥時燕刺王旦謀反將死之象也其

月發覺伏辜京房易傳曰誅不原情厥妖鼠舞門師古曰不

原情者不得其本情成帝建始四年九月長安城南有鼠啣黃

蒿栢葉上民冢栢及榆樹上為巢桐栢尤多師古曰栢栢本亭名

衛思后於其地葬也巢中無子皆有乾鼠矢數十時議臣以為恐



有水災鼠盜竊小蟲夜出晝匿今晝去穴而登木象賤人將居顯貴之位也桐栢衛后園所在也其後趙皇后自微賤登至尊與衛后同類趙后終無子而為害明年有鳶焚巢殺子之異也

師古曰鳶鵂也音弋全反

天象仍見甚可畏

也

仍頻也

一曰皆王莽竊位之象云京房易傳曰臣私祿

罔辟

李奇曰辟君也擅私爵祿誣罔其君

厥妖鼠巢

魏齊王正始中中山王周南為襄邑長有鼠從穴出語曰王周南爾以某日死周南不應鼠還穴後至期更冠

饋皂衣出語曰周南汝日中當死又不應鼠復入穴斯須更出語如向日適欲中鼠入須臾復出出入轉更數語如前日適中鼠曰周南汝不應我復何道言絕顛蹶而死即失衣冠取視具如常鼠按班固以為黃祥時曹爽專政競為比周故鼠作變也

晉太康時彭蠡化為鼠

見蟲異門

陳後主禎明二年四月羣鼠無數自蔡州岸入石頭淮至青塘兩岸數日死隨流出江近青祥也京房易飛候

曰鼠無故羣居不穴衆聚者其君死未幾亡國

唐高祖武德元年秋李密王世充隔洛水相拒密營中  
鼠一夕渡水盡去占曰鼠無故皆夜去邑有兵 太宗  
貞觀十三年建州鼠害稼 二十一年渝州鼠害稼

高宗顯慶三年長孫無忌第有大鼠見於庭月餘出入  
無常後忽然死 龍朔元年十一月洛州猫鼠同處鼠  
隱伏象盜竊猫職捕齧而反與同象司盜者廢職容姦  
弘道初梁州倉有大鼠長二尺餘為猫所齧數百鼠

反嚙猫少選聚萬餘鼠州遣人捕擊殺之餘皆散去

中宗景龍元年基州鼠害稼睿宗景雲中有蛇鼠鬪

於右威衛營東街槐樹蛇為鼠所傷鬪者兵象玄宗

開元二年韶州鼠害稼千萬餘羣天寶元年十月魏

郡有猫鼠同乳甚於同處代宗大歷十三年六月隴

右節度使朱泚於兵家得猫鼠同乳以獻懿宗咸通

十二年汾州孝義縣民家鼠多茹蒿芻巢樹上鼠穴居

去穴登木賤人將貴之象僖宗乾符三年秋河東諸

州多鼠穴屋壞衣三月止鼠盜也天戒若曰將有盜矣  
昭宗乾寧末陝州有蛇鼠鬪於南門之內蛇死而鼠  
亡去

後唐潞王清泰三年三月有蛇鼠鬪於師子門外鼠殺  
蛇其年十二月晉高祖起兵於太原

宋太祖建隆元年夏相金均房商五州鼠食苗 二年

正月商州鼠食苗 太宗太平興國七年十一月岳州


鼠害稼九月京西民獻白鼠二 高宗紹興十六年廣

州清遠縣韶州翁源縣英德府真陽縣鼠食稼千萬為  
羣時廣東久旱凡羽鱗皆化為鼠有獲鼠於田者腹猶  
蛇文漁者夜設網旦視數百鱗皆鼠自夏徂秋為患數  
月方息歲為饑 孝宗乾道九年隆興府鼠害稼千萬  
為羣甚於螟蝗 淳熙五年八月淮東通泰楚高郵黑  
鼠食禾田無遺穗淮民大饑時江陵府十五里外羣鼠  
以千萬計蔽塞通達其色黑白青黃相雜與人并行為  
車馬所踐死者不可勝計凡三月乃息 光宗紹熙四

年饒州民家有二小鼠食牛角三徙牛牢不免角穿肉  
瘠以斃春秋書鼯鼠食牛角京房易傳曰祭天不謹為  
郊牛也不與民牛同占特鼠妖爾 寧宗慶元元年六  
月鄱陽縣民家一猫帶數十鼠行止食息皆同如母子  
相哺者民殺猫而鼠舐其血鼠象盜猫職捕而反相與  
同處司盜廢職之象也與唐龍朔洛州猫鼠同占

文獻通考卷三百十四





總校官庶吉士臣張能照

校對官檢討臣盧應

謄錄監生臣錢璠